

欽定古今圖書集成

曆象彙編乾象典



欽定古今圖書集成曆象彙編乾象典

第七十一卷目錄

雲霞部藝文二

雲賦

宋吳淑

春雲賦

田錫

雲賦

明朱同

雲潭記

陳獻章

夏雲多奇峯賦

錢文薦

雲霞部藝文二

詩詞

雲歌

晉傅元

詠雲

梁簡文帝

浮雲

同前

和王中書德充詠白雲

沈約

詠雲二首

吳均

詔問山中何所有賦詩以答

答齊高帝詔

陶弘景

雲歌

王臺卿

賦得題新雲

陳張正見

賦得白雲臨酒

前人

賦得處處春雲生

蔡凝

賦得白雲抱幽石

孔範

賦得含峯雲

唐太宗

詠雲

李嶠

雲

前人

詠雲

董思恭

雲

郭震

賦得白雲抱幽石

駱賓王

古今圖書集成
賦得春雲處處生

前人

秋雲

前人

詠雲

于季子

前題

李邕

白雲歌送劉十六歸山

李白

早望海霞邊

前人

賦得浮雲起離色送鄭述誠

韋應物

雲

杜甫

賦得寒雲輕重色送子恂入京

錢起

山中橫雲

皇甫冉

答郭黃中孤雲首章見贈

李益

白雲向空盡

周存

日暮碧雲合

許康佐

觀雲篇

劉禹錫

寒雲輕重色

張仲素

立春日曉望三素雲

李季何

春雲

白行簡

欲銷雲

盧殷

山出雲

陸暢

前題

李紳

前題

沈亞之

諷山雲

施肩吾

山出雲

張復

詠雲

姚合

賦得青雲千呂

林藻

雲

杜牧

前題

前人

詠雲

李商隱

蒼梧雲氣

項斯

雲

韓琮

霞

前人

孤雲

于武陵

雲

袁郊

孤雲

張喬

雲

來鵠

前題

羅鄴

浮雲

羅隱

雲

崔塗

前題

吳融

前題

鄭準

襄州試白雲歸帝鄉

黃滔

雲

徐夔

霞

前人

夏雲

曹松

雲

李中

春雲

前人

夏雲

前人

雲

幸夤遜

霞

王周

春雲

鄧倚

溪雲

釋皎然

白雲歌寄陸中丞使君長源

前人

孤雲

貫休

病起見閒雲

齊己

浮雲行

前人

看雲

前人

嶺雲

宋梅堯臣

秋雲

徐積

嶺雲

洪炎

五月二十四日晚雨忽晴浴罷獨臥池亭雲峯

奇峭出天東南既久方散

周紫芝

晚霞

朱熹

望北山雲

金趙秉文

夏雲多奇峯

李俊民

雲

前人

江雲

元郝經

孤雲

劉因

前題

程鉅夫

春雲

馬祖常

出山曉雲歌

袁正

赤城棲霞

曹文晦

華頂歸雲

前人

望雲

黃石翁

囊雲詩

明寧獻王權

山雲辭將歸作

黎充輝

瓊島春雲

李東陽

江霞

薛蕙

江雲

前人

孤雲

舒芬

賦得處處春雲生

皇甫汈

題趙仲穆看雲圖

僧良琦

以上詩

巫山一段雲

前蜀毛文錫

水龍吟

詠雲

宋趙長卿

風入松

岫雲

張炎

塞翁吟

友雲

前人

祝英臺近

耕雲

以上詞

前人

乾象典第七十一卷

雲霞部藝文二

雲賦

宋吳淑

夫雲者蓋川澤之氣而陰陽之聚也若乃淒然而興
澔然而雨杳藹從龍悠揚干呂瞻黃帝之花葩識漢
王之龍虎爾乃取象於坎觀繇於需或申歌於虞舜
或爲祥於慶都白起薊生之迹香隨王母之車出符
陽以聚散去蒼梧而卷舒至若考西郊不雨之象閱
南山朝濟之義蓋汾陰之寶鼎覆西方之隱士郁郁

紛紛非霧非塵山中草莽水上魚鱗亦云帝鄉仙馭
高唐麗質鳳翥鸞翔龍申夔屈周則爲瑞於觀河堯
則呈祥於沈璧至於濯魚待雨燃石聞香金枝玉葉
繡文錦章或見飛鳥或瞻羣羊保章驗吉凶之祲觀
臺書啓閉之祥別有縹緲赤繒翩翩白鵠露彼菅茅
見茲珠玉蒸旣潤礎雨當待族漢皇興豐沛之歌王
母奏瑤池之曲宋觀松上漢紀封中驚林木之爲狀
見冠纓之雍容覩青天之樂廣見白日之姜公映雉
免於晴碧駐車蓋於遙空復有膚寸而合觸石而起

紀黃帝之官美仲容之器白作湯祥黃爲舜瑞雖無
出岫之心亦有思山之意觀其崔巍龍嶢狎獵參差
亂走丹虵輕飄絳衣或見夾日之赤鳥或觀圍軫之
蒼霓斯所以垂災異之譴警政令之虧豈徒誦漢武
秋風之句翫湯休日暮之詩

春雲賦

田錫

玉瑄春迴金門暖來柔先變柳絮已飄梅悅和風之
日至賞雲彩之朝隰其初升也穠蒼蔚兮其少進也
澹怡融兮依然方觸類以多曙藹藹然若含情而

古今圖書集成
自迷有時散作雨飛春寒慘慘有時亂和烟起春陰
悽悽或蒼梧南北或夢澤東西或樊川與輞川或吳
谿與越谿或宿林園隨竹陰以籠徑或沉村落伴桃
花而滿蹊或祁祁出關或溶溶映水或北渚縈住或
東風吹起或湧如波駭積芳野兮千重或曳若練舒
橫碧天之半里江中令醉吟不足高閣閒登王仲宣
遠望有餘危樓獨倚疊疊連根磷磷淺文千狀萬態
山陰水濱當青麥燕飛野色朝淨或平蕪雉過韶陽
夕曛挂古木之橫枝纖微欲斷覆孤村之半路融薄

將分旭日未高晴天尚早幾片明滅兮殘雪方消一
脈輕鮮兮愁蛾淡掃上國美景五陵勝道覆梁王之
水榭下繞落花映韓嫣之金丸遠沉芳草澹澹霏霏
涵凝麗輝漠漠依依舒遲翠微野態不定幽容且奇
浮澤國之嶺頭閒傷斷夢生蘇門之席上想滿仙衣
或漢世故宮雀暄空屋或梁朝古寺水映疎籬或阮
籍嘯臺雨吹半日或嚴陵釣石鳥立多時或桑乾戰
場平沙渺莽或椒塗永巷羣閣參差佇立閒望纏綿
動思想觸石以初起旋浮空而散馳塞遙而歸鴈相

古今圖書集成
逐天闊而殘霞共飛餘態遺妍思得杜陵畫品含毫
寫景詎徵楚澤芳詞

雲賦

明朱同

客有指白雲而問於主人者曰山澤之隈滄海之湫
瀚然而升氣虛以浮不足而行委蛇而風與水爲偕
匪蛟匪龍油然而興伊誰蒸之沛然而雨伊誰注之
御空而遊誰其負之卷海而翻誰其怒之八表同昏
誰其屯之一色晴昊又誰埽之乘風而馳姬滿之八
駿不能追也凝然而止劉秀之六軍不能擬也填山

隘谷風雨淒淒當是時也大塊一氣不知端倪恍然
霽止乾呈坤露於斯時也鳳翥鸞翔奇峰羅布映日
而霞孰染其丹凝寒而霰孰結其丸變化俄頃不知
其端若是者懸河之口長虹之筆不得而殫也子盍
爲我言之主人笑而應之曰子獨不見夫水乎一泓
之少一勺之多澄之爲鏡撓之爲波渴者思飲垢者
思滌淵之而清激之而白是豈足以盡夫水之迹哉
迨夫天池之茫洋北溟之浩蕩浸日月而不以爲深
載山岳而不以爲廣鷗鵬之所不至而舟楫之所不

古今圖書集成
嚮百川注之而不溢尾閭洩之而不竭颶風振之而不搖太陽沸之而不熱是以窮天地亙萬古而不能磨滅者也而雲實祖之子又不見夫風乎薰然南來百卉斯茂淒其西至悉斯以皴大王斯民有雌有雄鬻發和暢有春有冬若是者豈足以盡夫風哉爾乃細入無內大充無垠吸之而寒噓之而溫蓬然而起馳乎八極寂然而止不見其迹禦寇之所御大鵬之所搏冷然而往倏然而還是其浩然而充乎兩間者也而雲實乘之且夫太陽之精其亙千里緯大而行

周而成歲一北一南一寒一暑歲月日時由茲以起萬物之生成二氣之降升咸由於是爾乃入昧谷淪幽都載大地於一周出扶桑之東隅蒸水氣而上征浮沆瀣於太虛此雲之所以出渤澥起山谷而昇天衢也請觀夫五岳之巔四瀆之瀆水無日而不降雲無日而不興恍惚變化糾錯紛紜果孰宰而孰君之耶其有濟於人也則爲祥爲慶時雨甘霖其有害於人也則爲癡爲瘴曰災曰淫而雲亦何嘗容心哉言未旣客矍然而起長跪而謝曰往者徒覩其形未究

古今圖書集成
其理子發吾蒙至矣盡矣主人曰未也請爲子歌之
歌曰水爲父兮風爲馬太陽蒸兮九之野出大壑兮
浮蒼天沛然而降兮油然而升去不知所歸兮來不
知所爲倏而合兮忽而離乘吾車兮高翔駕白螭兮
驂鳳凰豐隆先驅兮應龍馭與爾遊兮帝之鄉

雲潭記

陳獻章

白沙之西山則圭峰也東北連數峰最勝者爲綠護
屏屏之有潭淵然曰聖池下蟠蛟龍龍噓氣成雲變
化萬狀里生周鎬偕其季京來謁予白沙時維仲春

風日晴美予與二子攜酒飲於西山之麓班荆而坐
仰而四顧有雲起綠護屏炫爛如丹青郁紛若祥瑞
予顧謂二子曰是聖池之雲也偉哉觀乎二子愀然
正襟侍側曰是吾先子之志也先子居龍溪垂五十
年無他嗜好惟喜爲潭之觀故先子之號曰雲潭予
曰嘻有是哉若先子我舊不幸而早世不及見若兄
弟長也若豈盡聞之乎居吾語汝夫潭取其潔也雲
取其變也潔者其本乎變者其用乎二子齊應聲曰
然予曰未也野馬也塵埃也雲也是氣也而雲以蘇

古今圖書集成
枯澤物爲功易曰密雲不雨自我西郊是也水以動爲體而潭以靜爲用物之至者妍亦妍媸亦媸因物賦形潭何容心焉是之取爾二子喜相謂曰先生命我矣於是復進而告之曰天地間一氣而已詘信相感其變無窮人自少而壯自壯而老其歡悲得喪出處語默之變亦若是而已孰能久而不變哉變之未形也以爲不變旣形也而謂之變非知變者也夫變也者日夜相代乎前雖一息變也况於冬夏平生於一息成於冬夏者也夫氣上蒸爲水下注爲潭氣水

之未變者也一爲雲一爲潭變之不一而成形也其必有將然而未形者乎默而志之可與論易矣二子於是起而再拜乞書爲雲潭記

夏雲多奇峰賦

錢文薦

客有依樹而息影臨流而賦詩者會追河朔遊擬南皮碧沼暑退玉壺冰隨羽觴罷舉紈扇停揮聊移遠目忽覩靈奇於時似烟非烟似霧非霧細縕而起掩藹而聚合體則一柱孤擎分狀則千巖悉具其爲峰也高參霄漢遠亘天涯峭乃峯嶺空則豁舒或擢根

而連杪或敷葉而帶葩或凌風而疊雪或映日而流霞著色淺澹布境幽遐紛紜競賞煜煜爭誇髣髴崑崙之五色依稀嵩少之三花至於綠蘿徑封青蓮烟吐窈窕難測嗟峩易覩誰將地肺倒插天府驅遣豈鞭斲雕寧斧則有誤認王母之輦虛疑神女之臺香馥郁以有在態輕盈而忽來所以望氣者思寶鼎於汾水求仙者慕銀闕於蓬萊徒惜其殘暉欲收異彩將散高標半折連影中斷勢傾危其不支容黯黹以無見類舟覆矣悽惋同嶽頽兮眷戀無怪乎會心者

猶注想而凝眸惜景者遂興咨而發歎也况其時值炎蒸氣乖潤濕倚崖樹槁縈岫苔澀雖仰天而頻望徒觸石而罕出倘乘龍以高飛庶施雨之徧及

雲霞部藝文三

雲歌

晉傅元

白雲翩翩翔天庭
流景鬢鬚非君形
白雲飄飄捨我
高翔青雲徘徊爲我愁腸

詠雲

梁簡文帝

浮雲舒五色
瑪瑙應霜天
玉葉散秋影
金風飄紫烟

浮雲

同前

可憐片雲生
暫重復還輕
欲使襄王夢
應過白帝城
和王中書德充詠白雲
沈約

古今圖書集成
白雲自帝鄉氛氳屢迴沒蔽虧崑山樹含吐瑤臺月
秋風西北起飄我過城闕城闕已參差白雲復離離
皎潔在天漢倒影入華池將過丹丘野時至碧林垂
九重迎飛鵠萬里送翔螭

詠雲二首

吳均

飄飄上碧虛藹藹隱青林氛氳如有意縈鬱詎無心

二

白雲蒼梧來過拂章華臺逢河散復卷經風合且開

詔問山中何所有賦詩以答

答齊高
帝詔

陶弘景

山中何所有嶺上多白雲只可自怡悅不堪持贈君

雲歌

王臺卿

玉雲初度色金風送影來全生疑魄暗半去月時開
欲知無去所一爲上陽臺

賦得題新雲

陳張正見

西北春雲起遙臨偃蓋松根危纔吐葉氣淺未成峰
風前飛未斷日處影疑重體輕無五色詎是得從龍
賦得白雲臨酒

前人

古今圖書集成
白雲蓋濡水流彩入澠川疎葉臨嵇竹輕鱗入鄭船
菊泛金枝下峰斷玉山前一朝開五色飄飄映十千
賦得處處春雲生
蔡凝

春色遍空明春雲處處生入風衣暫斂隨車蓋轉輕
作葉還依樹爲樓欲近城含愁上對影似有別離情
賦得白雲抱幽石
孔範

白雲浮遠蓋飄飄繞石飛帶蓮縈錦色拂鏡下仙衣
陣結香爐隱羅成玉女微能感荆王夢陽臺雜雨歸
賦得含峰雲
唐太宗

翠樓含曉霧蓮峰帶晚雲玉葉依巖聚金枝觸石分
橫天結陣影逐吹起羅文非復陽臺下空將惑楚君
咏雲
李嶠

英英大梁國郁郁祕書臺碧落從龍起青雲觸石來
官名光邃古蓋影耿輕埃飛感高歌發威加四海迴
雲
前人

大梁白雲起氛氲殊未歇錦文觸石來蓋影凌天發
煙熅萬年樹掩映三秋月會入大風歌從龍赴員闕
詠雲
董思恭

古今圖書集成
帝鄉白雲起飛蓋上天衢帶月綺羅映從風枝葉敷
參差過層閣倏忽下蒼梧因風望既遠安得久踟躕
物蔽月遮星作萬端

雲

郭震

賦得白雲抱幽石

駱賓王

重巖抱危石幽澗曳輕雲繞鎮仙衣動飄蓬羽蓋分
錦色連花靜苔光帶葉熏詎知吳會影長抱穀城文
賦得春雲處處生

前人

千里年光靜四望春雲生暫日祥光舉疎雲瑞葉輕
蓋陰籠迴樹陣影抱危城非將吳會遠飄蕩帝鄉情
秋雲

前人

南陸銅渾改西郊玉葉輕泛斗瑤光暗臨陽瑞色明
蓋陰連鳳闕陣影翼龍城詎知時不遇空傷流滯情
詠雲

于季子

瑞雲千里映祥輝四望新隨風亂鳥翅汎水結魚鱗
布葉疑臨夏開花詎待春願得承嘉景無令掩桂輪

前題

李邕

古今圖書集成
綵雲驚歲晚繚繞孤山頭散作五般色凝爲一段愁
影雖沈澗底形在天際遊風動必飛去不應長此留

白雲歌送劉十六歸山

李白

楚山秦山皆白雲白雲處處長隨君君入楚
山裏雲亦隨君渡湘水湘水上女蘿衣白雲堪臥君
早歸

早望海霞邊

前人

四明三千里朝起赤城霞日出紅光散分輝照雪厓
一餐嚙瓊液五內發金沙舉手何所待青龍白虎車

賦得浮雲起離色送鄭述誠

韋應物

遊子欲言去浮雲那得知偏能見行色自是獨傷離
晚帶城遙暗秋生峯尚奇還因朔吹斷匹馬與相隨

雲

杜甫

龍以瞿唐會江依白帝深終年常起峽每夜必通林
收穫辭霜渚分明在夕岑高齋非一處秀氣豁煩襟

賦得寒雲輕重色送子恂入京

錢起

無限寒雲色蒼茫淺更深從龍如有瑞捧日不成陰
積翠全低嶺虛明半出林帝鄉遙在目鐵馬又駸駸

山中橫雲

皇甫冉

湘水風日滿楚山朝夕空連峯雖已見猶念長雲中

答郭黃中孤雲首章見贈

李益

孤雲生西北從風東南飄帝鄉日已遠蒼梧無還麟

已矣元鳳歎嚴霜集靈苔君其勉吾懷歲暮孰不彫

白雲向空盡

周存

白雲生遠岫搖曳入晴空乘化隨舒卷無心任始終

欲銷仍向日將斷或因風勢薄飛難定天高色易窮

影收元氣表光滅太虛中儻若從龍去還施潤物功

日暮碧雲合

許康佐

日際愁陰生天涯暮雲碧重重不辨蓋沈沈乍如積

林色黯疑暝隙光俄已夕出岫且從龍縈空寧觸石

餘輝澹瑤草浮影凝綺席時景詎能留幾思輕尺璧

觀雲篇

劉禹錫

與雲感陰氣疾走如見機晴來意態行有若功成歸

葱蘢含晚景潔白凝秋暉夜深度銀漢漠漠仙人衣

寒雲輕重色

張仲素

佳期當可許託思望雲端鱗影朝猶落繁陰暮自寒

古今圖書集成
因風方嫋嫋間石已漫漫隱映看鴻度霏微覺樹攢
凝空多似黛引素乍如紈每向愁中覽含毫欲狀難
立春日曉望三素雲
李季何

靄靄青春曙飛仙駕五雲浮輪初縹緲承蓋乍氤氳
薄影隨風度殊容向日分羽毛紛共遠環珮杳猶聞
靜合烟霞色遙將鸞鶴羣年年瞻此御應許從元君

春雲

白行簡

漠漠復溶溶乘春任所從映林初展葉觸石未成峯
旭日消寒翠晴烟點淨容霏微將自滅深淺又如重

薄彩臨溪散輕陰帶雨濃空餘負樵者嶺上自相逢

欲銷雲

盧殷

欲隱從龍質仍餘觸石文霏微依碧落髣髴非雲
度月光無隔傾河影不分如逢作霖處當爲起氤氳

山出雲

陸暢

靈山蓄雲彩紛郁出清晨望樹繁花白看峯小雪新
映松張蓋影依澗布魚鱗高似從龍處低如觸石頻
濃光藏半岫淺色類飄塵玉葉開天際遙憐占早春

前題

李紳

杳靄祥雲起飄颺翠嶺新
縈峯開石秀吐葉間松春
林靜翻空小山明度嶺頻
迴崖時掩鶴幽澗或隨人
姑射朝凝雪陽臺晚伴神
悠悠九霄上應坐玉京賓

前題

沈亞之

片雲朝出岫孤色迴難親
蓋小辭山早根輕觸石新
飄揚經綠野明麗照青春
拂樹疑舒葉臨江似結鱗
從龍方有感捧日豈無因
看助為霖去恩沾雨露均

諷山雲

施肩吾

閒雲生葉不生根常被重重蔽
石門賴有風簾能掃

蕩滿山晴日照乾坤

山出雲

張復

山靜雲初吐霏微觸石新
無心離碧岫有葉占青春
散類如虹氣輕同不讓塵
凌空還似翼映澗欲成鱗
異起臨汾鼎疑隨出峽神
為霖終濟旱非獨降賢人

詠雲

姚合

靄靄紛紛不可窮
曼笳歌處盡隨龍
來依銀漢一千
里歸傍巫山十二峯
呈瑞每聞開麗色
避風仍見挂
喬松憐君翠染雙
蟬鬢鏡裏朝朝近
玉容

賦得青雲千呂

林藻

應節偏千呂亭亭在紫氛綴雲初度影捧日已成文
結蓋祥光迴爲樓翠色分還同起封上更似出橫汾
作瑞來藩國呈形表聖君徘徊如有託誰道比閒雲

雲

杜牧

盡日看雲首不回無心都大似無才可憐光彩一片
玉萬里晴天何處來

前題

前人

東西那有礙出處豈虛心曉入洞庭闊暮歸巫峽深

渡江隨鳥影擁樹隔猿吟莫隱高唐去枯苗待作霖

詠雲

李商隱

捧月三更斷藏星七夕明纔聞飄迴路旋見隔重城
潭暮隨龍起河秋壓鴈聲只應惟宋玉知是楚神名

蒼梧雲氣

項斯

何年化作愁漠漠便難收數點山能遠平鋪水不流
濕連湘竹暮濃蓋舜墳秋亦有思歸客看來盡白頭

雲

韓琮

深惹離情靄落暉如車似蓋早依依山頭觸石應常

在天際從龍自不歸莫向隙牕籠夜月好來仙洞濕
行衣春風淡蕩無心後見說襄王夢亦稀

霞

前人

應是行雲未擬歸變成春態媚晴暉深如綺色斜分
閣碎似花光散滿衣天際欲銷重慘淡鏡中間照正
依稀曉來何處低臨水無限鴛鴦妬不飛

孤雲

于武陵

南北各萬里有雲心更閒因風離海上伴月到人間
洛浦少高樹長安無舊山徘徊不可駐漠漠又空還

雲

袁郊

楚甸嘗聞旱魃侵從龍應合解爲霖荒淫却入陽臺
夢惑亂懷襄父子心

孤雲

張喬

舒卷因風何所之碧天孤影勢遲遲莫言長是無心
物還有隨龍作雨時

雲

來鵠

千形萬象竟還空映水藏山片復重無限旱苗枯欲
盡悠悠閒處作奇峯

前題

紛紛靄靄遍江湖得路為霖豈合無莫使悠颺只如此帝鄉還更暖蒼梧

羅鄴

浮雲

羅隱

溶溶曳曳自舒張不向蒼梧即帝鄉莫道無心便無事也曾愁殺楚襄王

雲

崔塗

得路直為霖濟物不然閒共鶴忘機無端却向陽臺畔長送襄王暮雨歸

前題

吳融

南北東西似客身遠峯高鳥自為鄰清歌一曲猶能住莫道無心勝得人

前題

鄭準

片片飛來靜又閒樓頭江上復山前飄零盡日不歸去點破青光萬里天

襄州試白雲歸帝鄉

黃滔

杳杳復霏霏應緣有所依不言天路遠終望帝鄉歸高嶽和霜過遙關帶月飛漸憐雙闕近寧恨衆山違

陣觸銀河亂光連粉署微旅人隨計日自笑比麻衣
雲 徐夔

漠漠沈沈向夕暉蒼梧巫峽兩相依天心白日休空
蔽海上故山應自歸似蓋好臨千乘載如羅堪翦六
銖衣為霖須救蒼生早莫向西郊作雨稀

霞

前人

天際何人濯錦歸偏宜殘照與晨暉流為洞府千年
酒化作靈山幾襲衣野燒燄連殊赫奕愁雲陰隔乍
依稀勞生願學長生術食盡紅桃上漢飛

夏雲

曹松

勢能成岳勿頃刻長崔嵬暝鳥飛不到野風吹得開
一天分萬態立地看忘回欲結暑宵雨先聞江上雷
雲 李中

悠悠離洞壑冉冉上天津捧日終為異從龍自有因
高行四海雨暖拂萬山春靜與霞相近閒將鶴最親
帝鄉歸莫問楚殿夢曾頻白向封中起碧從詩裏新
冷容橫釣浦輕縷絆蟾輪不滯濃還淡無心卷復伸
非煙聊擬議干呂在逡巡會作五般色為祥覆紫宸

古今圖書集成
春雲

前人

陰去爲膏澤晴來媚曉空無心亦無滯舒卷在東風
如峯形狀在西郊未見從龍上沈寥多謝好風吹起
候化爲甘雨濟田苗

夏雲

前人

雲

幸夤遜

因登巨石知來處勃勃元生綠蘚痕靜卽等閒藏草
木動時頃刻遍乾坤橫天未必朋元惡捧日還曾瑞
至尊不獨朝朝在巫峽楚王何事謾勞魂

霞

王周

拂拂生殘暉層層如裂緋天風翦成片疑是仙人衣

春雲

鄧倚

搖曳自西東依林又逐風勢移青道裏影泛綠波中
夕霽方明日朝陽復蔽空度關隨去馬出塞引歸鴻
色任寒暄變光將遠近同爲霖如見用還得助成功

溪雲

釋皎然

舒卷意何窮縈流復帶空有形不累物無跡去隨風
莫怪長相逐飄然與我同

古今圖書集成
白雲歌寄陸中丞使君長源

前人

一見西山雲使人情意遠憑高發詠何超遙道妙如
君有舒卷縈空疊景多麗容衆峯峯上自爲峯潔白
不繇陰雨積高明肯共雜煙重萬物有形皆有著白
雲有形無繫縛黃金被爍玉亦瑕一片飄然汗不著
或逢天上或人間人自營營雲自閒忽爾飛來暫爲
侶忽然飛去莫能攀逸民對雲效高致禪子逢雲增
道意白雲遇物無偏頗自是人心見同異閭闔天門
宜曙看爲纓作蓋擁千官從龍合沓臨清暑就日透

迤繞露寒誰憐西山雲亭亭處幽絕坐石長看非我
羈手中欲攬待君說貞白先生那得知只向空山自
怡悅

孤雲

貫休

將比鷺鷥還恐屈始思殘雪不如多清風相引去更
遠皎潔孤高奈爾何

病起見閒雲

齊己

病起見閒雲空中聚又分滯留堪笑我舒卷不如君
觸石終無跡從風或有聞仙山足鸞鳳歸去自同羣

古今圖書集成
浮雲行

前人

大野有賢人大朝有聖君如何彼浮雲掩蔽白日輪
安得東南風吹散八表外使之天下人共見堯眉彩

看雲

前人

何峯觸石濕苔錢便逐高風離瀑泉深處臥來真隱
逸上頭行去是神仙千尋有影滄江底萬里無蹤碧
落邊長憶舊山青壁裏遶菴閒伴老僧禪

嶺雲

宋梅堯臣

片雨過青天山雲歸絕嶺林際隱微虹溪中落行影

還看隴首飛復愛山間靜

秋雲

徐積

淡似秋河水濃於春塢烟隴頭寒塞雁峽外晚江天
忽斷月華墜乍明虹影連西風休強管飛勢自翩翩

嶺雲

洪炎

吾居半山上繞屋猶峻嶺舉頭卽見之坐臥作牆屏
忽復不可求瀕洞雲萬頃初疑岸谷變身不踐人境
俄頃如故常突兀在屋頂隱見須臾間變態莫記省
烟霞成痼疾終日常炯炯早閱金丹訣未辦下窰井

古今圖書集成
世亂一丘壑斯志或可逞鳴猿落空岩翥鶴颺晴影
石泉漱芳潤草木皆秀整洞天有歸路未往心已領
五月二十四日晚雨忽晴浴罷獨臥池亭雲峯
奇峭出天東南既久方散
周紫芝

長虹截天雨初斷孤月翻光上雲漢忽從海底出三
山就中蓬萊最奇觀黃金塗闕射日光白玉飛欄入
天半青童舞女各嫵姍手執雲幢影凌亂想得神清
洞府君應傍春皇侍香案羣飛白鶴徒爾爲化作蒼
狗何勞看神仙出沒不久長碧落天宮豈容翫荆王

曉夢只須臾神女乘鸞逐雲散人間幻化無不爾空
復歛歛一長歎老人假寐忽舉頭但見明星光有爛

晚霞

朱熹

日落西南第幾峯斷霞千里抹殘紅上方傑閣凭欄
處欲盡餘暉怯晚風

望北山雲

金趙秉文

浮雲起太行六合須臾間清風相汲引吹我過榆關
歲旱不成雨悠然歸故山向來無心出亦復無心還
夏雲多奇峯
李俊民

古今圖書集成
幸得從龍變態尚何出岫無心正苦人間畏日不思
天上爲霖

雲

前人

早魃將爲虐從龍便出山人間三尺雨命駕早知還

江雲

元郝經

江雲似流水渺渺復粼粼
晝靄無窮態紆餘不盡春
遮回斷行鴈望殺未歸人
何日星輶路憑高更憶親

孤雲

劉因

孤雲生幾時冉冉何所適
豈無崑華高路遠嗟獨力

徘徊天中央明月爲顏色
下有幽棲士歲晏倚青壁
朝飲澗下泉暮拂松間石
相對澹忘情倒影寒潭碧

孤雲

程鉅夫

渺渺從何起亭亭只自飛
朝隨風鶴去暮逐雨龍歸
幾度超滄海多應點翠微
何時能借我裁作羽人衣

春雲

馬祖常

高雲起城闕流離度庭樹
依風拂迴塘波瀾光影注
荒林帶疎烟照日亂縈縷
婉變連浮陽空明映淒霧
嵐翠含玉暉景采滿巖嶼
逍遙幽賞諧緬邈世娛阻

古今圖書集成
出山曉雲歌

袁正

大坤濕氣蒸崐龍油然勃然連蒼穹曙窓注望東巴
峯須臾不見青芙蓉初疑博山噴出紫雲縷又疑蜃
精海底推起龍王宮東西模糊總一色上下變幻知
幾重既非芒碭山中隱劉季又非陽臺神女遙相通
蒼文元豹隱丹壑失巢老鶴迷青松忽見千株萬株
老古檜化作千丈萬丈蒼精龍斷崖滴翠晴灑灑落
花細雨春濛濛金烏欲上海水赤神光盪射生青紅
狂飆捲地忽吹盡依然繡出金屏風奇奇怪怪渺無

際且將浩興收拾填心胷

赤城棲霞

曹文晦

赤城霞起建高標萬丈紅光映碧寥美人不卷錦繡
段仙翁瀉下丹砂瓢氣連海嶼貫旭日光入溪甕生
春潮我欲結爲五色佩碧桃花下呼周喬

華頂歸雲

前人

四萬八千山上山山中夜夜白雲還底須出岫彌六
合且復與僧分半間古殿結陰燈影澹長松畱暝寺
門關謫仙已覽廬山秀畱得書堂相對閒

望雲

黃石翁

日出五丈高白雲浩如海城郭在雲中山人在雲外
望雲雲氣深入雲雲氣淺亦欲入深雲不知雲近遠

囊雲詩

明寧獻王權

蒸入琴書潤粘來几榻寒小齋非嶺上弘景坐相看

山雲辭將歸作

黎充輝

清江兮淙淙上有山兮穹窿白雲兮谷口一碧兮千
峯掩靄兮絕壁挂偃蹇兮長松朝迎兮秋陽暮捲兮
秋風山之人兮雲從被薜荔兮攀芙蓉來乘雲兮朝
九重跨一鶴兮江東點汀花兮白蘋雨霜葉兮丹楓
忽雲歸兮人遠山蒼蒼兮倚晴空

瓊島春雲

李東陽

瑤峯獨立倚空蒼雲去雲來兩不妨旋逐春寒生苑
樹更隨晴日度宮牆玉皇居處重樓擁太史占時五
色光若與山龍同作繪也須能補舜衣裳

江霞

薛蕙

春江變氣候孤嶼發雲霞散影搖青草流文漾碧沙
紅泥迷燕子丹洞失桃花水宿淹晨暮應憐謝永嘉

江雲

前人

謝客弄春水江臯生綵雲紛紛初散綺葉葉漸成文
蔽日皆相映流風乍不分何因可持贈欲以慰離羣

孤雲

舒芬

一片孤雲逐漢飛東西終日竟何依傍人莫道能為
雨惟恨青山未得歸

賦得處處春雲生

皇甫汈

春色藹無際朝雲最可憐金枝紛映帶玉葉綴聯翩
弄影交疏裏含情飛蓋邊長安遙向日何處奉非煙

題趙仲穆看雲圖

僧良琦

舊游清茗上愛看弁峯雲稍將春雨度始見遠林分
起滅悟真理逍遙遺世紛於焉自怡悅永懷陶隱君

巫山一段雲

前蜀毛文錫

雨霽巫山上雲輕映碧天遠風吹散又相連十二晚
峯前暗濕啼猿樹高籠過客船朝朝暮暮楚江邊
幾度降神仙

水龍吟

詠雲

宋趙長卿

先來天與精神更因麗景添殊態拖輕冉冉纔凝一
段還分五綵畢竟非煙有時為雨惹晴無奈道無心
怎被歌聲遏斷遲遲向青天外宜伴先生醉臥得
饒到和山須買也會惱煞襄王誰道依前不會我欲

古今圖書集成
乘歸去翻恨悵帝鄉何在念佳期未展天長暮合儘
空相對

風入松 岫雲

張炎

卷舒無意入虛元丘壑伴雲烟石根青氣千年潤覆
孤松深護啼猿靄靄靜隨仙隱悠悠閒對僧眠 傍
花嬾向小溪邊空谷覆流泉浮蹤自感今如此已無
心萬里行天記得看人歸去御風飛過斜川

塞翁吟 友雲

前人

交到無心處出岫細話幽期看流水意俱遲且澹薄

相依凌霄未肯爲霖去物外共鶴忘機迷古洞掩晴
暉翠微濕紅衣 飛飛垂天翼飄然萬里愁日暮佳
人未歸尚記得巴山夜雨耿無語共說生平都付陶
詩休題五朶莫問陽臺不贈相思

祝英臺近 耕雲

前人

占寬閒鉏浩渺船樣小邨悄非霧非煙生氣覆瑤草
蒙茸數畝春陰夢魂落寞知踏碎梨花多少 聽孤
嘯山淺種玉人歸縹緲度晴峭鶴下芝田五色散微
照笑他隔浦誰家半江疎雨空吟斷一犁清曉

欽定古今圖書集成曆象彙編乾象典

第七十二卷目錄

雲霞部選句

雲霞部紀事一

乾象典第七十二卷

雲霞部選句

楚屈原九歌紛吾乘兮元雲又表獨立兮山之上雲
容容兮而在下

九章雲霏霏其承宇又願寄言於浮雲兮遇豐隆兮
不將又眇遠志之所及憐浮雲之相羊

遠遊食六氣而飲沆瀣兮漱正陽而含朝霞又淹浮
雲而上征又名豐隆使先導兮問大微之所居

九辯仰浮雲而求歎又何汜濫之浮雲兮焱靡蔽此

明月又願皓日之顯行兮雲蒙蒙而蔽之

漢賈誼旱雲賦惟昊天之大旱兮失精和之正理遙望白雲之蓬勃兮滃滃澹澹而妄止運清濁之瀕洞兮正重沓而並起崑隆崇以崔巍兮時彷彿而有似屈卷輪而中天兮象虎驚與龍駭相搏據而俱興兮妄儷倚而時有遂積聚而合沓兮相紛薄而慷慨若飛翔之從橫兮揚波怒而澎湃

董仲舒雨雹對太平之世雲則五色而爲慶三色而爲霽

魏曹植幽思賦望翔雲之悠悠羌朝霽而夕陰

晉左思蜀都賦舒丹氣而爲霞

孫綽天台山賦赤城霞起而建標瀑布飛流以界道陶潛歸去來辭雲無心以出岫

宋謝惠連雪賦寒風積愁雲繁又河海生雲朔漠飛

沙連氛絜霽掩日韜霞

齊孔稚圭北山移文高霞孤映

梁蕭統七名綺霞映水又十二月啓愁雲拂岫帶枯

葉以飄空又彤雲垂四面之葉

元帝蕩婦思秋賦秋雲似羅

江淹知己賦采耀秋月文麗冬霞又恨賦隴鴈少飛

代雲寡色

庾信司馬裔碑銘谷寒無日山空足雲

盧思道納涼賦火雲赫而四舉

唐文宗祭北岳文絕壁千尋孤峯萬仞桂華侵月松

蘿掛雲

張九齡龍池聖德頌序陽春播澤觸類皆滋泰山起

雲無遠不徧

楊炯少室山少姨廟碑青霞起而照天

王勃滕王閣序落霞與孤鶩齊飛

駱賓王冒雨尋菊序參差遠岫斷雲將野鶴俱飛

陳子昂金門餞序殘霞將落日交輝

張說詔宴薛王山池序玩峯雲之映沼又元武門侍

射詩序繁雲覆城大雪飛苑

韓休奉和聖製喜雨賦九光之霞冠於雲日五色之

氣映於巖谿

宋昱日暮碧雲合賦夕望兮見碧雲之出岑過太液

拂上林混蒼蒼之正色垂漠漠之輕陰西陸月弦南山風落輕濃象似倏忽龍螭集高議之臺連寓直之閣亭亭廣陌異公子之飛蓋裔裔長空如美人之卷幕

王諱南至雲物賦雲散黃光天浮喜氣金柯郁郁而蔽野玉葉飄飄而委地又佳氣從龍遙連渭北非煙拂日俯對終南

李華高宗康頌油油時雲雨厥百穀
獨孤及馬退山茅亭記手揮絲桐日送還雲

韓愈賀雨表中使纔出於九門陰雲已垂於四野郭遵南至郊祭司天奏雲物賦度青霄而匪徐匪疾向丹闕而乍合乍分應乎一陽之始煥乎五彩之文氤氳搖曳去來無際望之雖日崇朝慶之知其嗣歲誰謂其有葉本乎觸石而來誰謂其無心偏舒捧日之勢

元稹郊天日五色祥雲賦排空乍直捧日初圓獸蹲而龍鱗熠熠鳥跂而鳳翼翩翩羽蓋凝而軒皇暫駐風馬駕而王母欲前影帶其彩疑錯繡之遙屬光照

乎物比摛錦之相連

王起五色雲賦露表嘉瑞國昭元吉發五色以斯呈
掩百祥而非匹輝光駭目知泛灑之惟新變化殊姿
覺淒清之有失若非澤無不被化無不率則何以感
之於寥天榮之於聖日爾其寂歷地表希微天宇無
聲有零有色斯覩始曖空而雜糅俄泣草而周普霑
于衣也皆成黼黻之衣潤于土焉更爲苴茅之士且
其白能受彩朱則孔揚青映苔而轉麗元點漆而有
光旣炫耀於衆彩終錯雜于中黃儻在瑠璃味無奈

于甘醴如浮葭莢色詎變于凝霜何滑兮之膏潤有
煥乎之文章固可以扶壽而愈疾俗泰而時康

張何早秋望海上五色雲賦懿夫騰碧海瑞皇家金
柯玉葉兼雜花文璀璨光紛華况夫羅幃錦帳繞香
車雙虹宛轉縈翠霞及夫倏而聚忽而散霓裳羽旆
相陵亂倚長空浮迴岸宛若瓊樓金闕橫天半美人
濯錦春江畔

喬潭秋晴曲江望太一納歸雲賦秦稱百二鎮爲太
一合沓橫空嶽岑蔽日豈瓌寶之攸產蓋雲雷之自

古今圖書集成
出宜其密爾王甸雄茲帝京敗葉風輕高秋氣清時
雨多歇歸雲晚晴俯枕曲水前臨直城山半隱而半
見雲乍低而乍傾其趣可賞而不極其容可狀而難
名爾其沈陰始解靄霽初歸迴日猶重因風則飛其
始也我我巍巍千巖萬嶺稠疊而相委其漸也紛紛
霏霏齊童趙女並舞而垂衣忽天澄而地廓鬱氛氳
於翠微別有容與之勢輕盈之狀日下空籠天邊引
颺始悠悠於綠野漸冪冪於青嶂洛川神女何以踰
巫峽佳人不能上雖更僕而非久仍移景而堪望落

日將曛山銜斷雲綠氣陰鬱嵐光氳氳橫截高巖驚
數峰之頓失却臨幽石與殘雪而俱分

無名氏慶雲抱日賦外浮相煥中映成文郁郁昱昱
續續紛紛始流形於孤嶽終垂象於九圍麗碧霄以
增媚捧金烏而徐飛又運叶堯年靈符舜日燦玉葉
以繁布抱金輪而半出

五色卿雲賦其爲狀也乃從龍以分氣其爲勢也若
搏鵬之垂翼蒼蔚非觸石而興縹緲盈畫工之飾蔥
翠炯晃蕭索氛氳迴合斐亶散聚分文轉光風則動

而愈出衝霽日則燦然皆分又光浮碧落奪虹彩於太虛影下清潭照錦色於曲浦

白雲無心賦翹玉葉以繚繞耀金柯而陸離其兆無形其質罕一匪潤礎以上昇或從龍而迴出又抱翠石以流彩入清池而寫文或假勢於重嶺或隔闕於孤山挺奇峯於天末互橫陣於巖間順細雨以低舉隨輕風而往還

明屠隆五色雲賦厥狀瑰麗元黃雜俎或如元圭或如玉珂或如靈芝或如玉禾或如絳綃或如紫紵或

如文杏之葉或如含桃之顆或如秋原之草或如春湘之波澹修眉之連蜷呈冶態而婀娜又如萬花競開百鳥齊飛奇姿窈窕秀色離披威鳳之彩葦蕤錦鷄之翼差池屑屑霏霏纚纚紛乎若纈蠹乎若鬚又如仙人製錦借色雲君濯彼天河五彩成文丹霞失麗明星載昏

費元祿轉情集晚霞乍紫乍紅如浣蜀江貝錦或朝或暮真開海市蜃樓微步凌波射練裙而成綺登高送日變素面而爲緋孤鶩齊翔南浦晴江之上建標

一色天台流水之間又王母崑崙未奉長年壽酒漢
家陵闕依然殘照西風唱新詞而歡不見織回文而
字難成好景無多造次投來新月征夫未息須臾隔
斷疎林臨水孤村尚辨滅明鴉背連天野草盡驅閒
冗車輪舒卷如金支翠旂變化若白衣蒼狗牕明楓
葉洞富松花海上病神仙何物遂能却掃山中貧道
士此時正好休糧

夏后鑄鼎繇逢逢白雲一南一北一西一東

漢武帝秋風辭秋風起兮白雲飛草木黃落鴈南歸

仲長統詩春雲為馬秋風為駟按之不遲勞之不疾

又朝霞潤玉

古樂府浮雲多暮色似從崦嵫來又蒼霞揚東謳

古詩日暮秋雲陰

魏文帝詩西北有浮雲亭亭如車蓋又丹霞夾明月

晉傅元詩織雲時髮鬢

陸機詩陰雲興巖側

張載詩朝霞迎白日丹氣臨湯谷

張協詩騰雲似涌烟又行雲思故山

顧凱之詩夏雲多奇峰

陶潛詩依舊楚渺渺西雲又飄飄西來風悠悠東

去雲又朝霞開宿霧又萬族各有託孤雲獨無依

宋顏延之詩流雲藹青闕

謝莊詩隱曖松霞被又夕天霽晚氣輕霞澄暮陰

謝靈運詩春晚綠野秀巖高白雲屯

謝瞻詩輕霞冠秋日

謝惠連詩霏雲生翠嶺

鮑照詩鱗鱗夕雲起又聚雲屯高岸又巖雲起亂山

又薄暮塞雲起

謝朓詩浮雲去欲窮又輕雲霽廣甸又積水照頰霞

又餘霞散成綺又川霞旦上薄又蒼雲暗九重北風

吹萬籟

梁簡文帝詩流霞乍斷續

沈約詩時雲靄空遠

江淹詩日暮碧雲合佳人殊未來又淺霞兮駁雲一

合兮一分又紅霞旦夕生又夏雲多襍色紅光鑠蕤

鮮又丹霞蔽陽景又崦嵫生暮霞又朱霞入牕牖又

長望竟何極
閩雲連越山
又蕭條晚秋景
旻雲承景斜

庾肩吾詩
同雲暗九天
又寒雲間石起
又陰雲助麥寒
又雲積似重樓

吳均詩
山上萬重雲
又沈雲隱喬木

何遜詩
日斜迢遞雨
風起嗟峨雲
又夕陽已西度
歸

霞亦半消
又早霞麗初日
又重霞映日餘
又水底見

行雲
又薄雲巖際宿

北魏溫子昇詩
丹霞起暮陰

北周王褒詩
東西御溝水
南北會稽雲

隋盧思道詩
晚霞浮極浦

薛道衡詩
石濕曉雲濃

唐太宗詩
霜天散夕霞

元宗詩
丹霞助曉光

李百藥詩
薄雲回空盡

宋之問詩
隴暗積愁雲
又山雨初含霽
江雲欲變霞

又山雜夏雲多

張九齡詩
照爛陰霞上

王勃詩頽雲蕭索見層空又畫棟朝飛南浦雲又天雲漸作霞

張說詩涼雲生竹樹又春山挂斷霞

張均詩汀霞變秋色

沈佺期詩北闕彤雲掩曙霞又霽雲無處所臺館曉

蒼蒼

王維詩白雲迴望合青靄入看無

李頎詩山雲覆陰谷

綦毋潛詩曠曠原上霞

儲光羲詩流霞明楚岸又落日燒霞明農夫知雨止

王昌齡詩暮霞照新晴歸雲猶相逐又山長不見秋

城色日暮蒹葭空水雲

常建詩亭亭碧流暗日入孤霞繼

孟浩然詩微雲淡河漢

李白詩牕落敬亭雲又奇峯出奇雲又紅霞朝夕變

又殘霞飛丹映江草又寥落暝霞色

韋應物詩隔林分落景餘霞明遠川又殘霞照高閣

又流雲吐華月

柳惲詩亭臯木葉下隴首秋雲飛又寒雲晦滄洲

岑參詩江樓暗寒雨山郭冷秋雲又潭樹暖春雲

李嘉祐詩朝霞晴作雨濕氣晚生寒

高適詩隔岸春雲邀翰墨

杜甫詩泄雲無定姿又片雲頭上黑應是雨催詩又

低空有斷雲又江東日暮雲又寒深北渚雲又雲在

意俱遲又峽雲籠小樹又宮雲去殿低又關雲常帶

雨又熱雲初集黑又四海八荒同一雲又山籬帶白

雲又合風翠壁孤雲細又荒戍密寒雲又松浮欲盡

不盡雲又山雲低度牆又野雲低度水又川雲自去

留又崔嵬晨雲白又落落出岫雲又晴天養片雲又

天上浮雲似白衣斯須倏變如蒼狗

錢起詩迴雲隨去鴈

皇甫冉詩積水長天隨遠客孤舟極浦足寒雲

顧况詩孤霞上沈寥

耿漳詩曉日上春霞

盧綸詩月露浩方下河雲凝不流又陰霞發海光

李益詩江亭萬里雲

韓愈詩晴雲如擘絮又皎潔當天月歲蕤捧日霞又

君詩多態度藹藹春空雲

劉禹錫詩江上詩情為晚霞又暮霞千萬狀又餘霞

張錦帳

孟郊詩古路無人到新霞吐石稜

張籍詩湘雲初起江沉沉又曉來江氣連城白

李賀詩海雲初生石城下又銀浦流雲學水聲又飛

雨過涼雲

白居易詩獸形雲不一又北軒涼吹開疎竹臥看青

天行白雲又徘徊去住雲又南山雲起北山雲

姚合詩山近滿廳雲又雲敲落照紅又嬾雲輕似絮

李羣玉詩閒雲觸石輕

杜牧詩晴雲如絮惹低空又嬌雲光占岫又洞雲生

片斷

許渾詩風卷曙雲飄角遠

李商隱詩高雲不動碧嵯峨又千里火雲燒益州又

曙霞星斗外又江上晴雲雜雨雲又齋鐘不散檻前

雲

馬戴詩餘霞媚秋漢又沙雲氣盡黃

崔櫓詩濕雲如夢雨如塵

溫庭筠詩閒雲無定貌

張喬詩山郭入樓雲又獨島伴餘雲

方干詩凍雲愁暮色又斷霞轉影侵西壁

羅隱詩芳草有情皆礙馬好雲無處不遮樓

韓偓詩細水浮花歸別澗斷雲含雨入孤村又雨晴

雲葉似連錢

無名氏詩翻憶舊山青碧裏遶菴間伴野僧禪

宋寇準詩暮天寥落凍雲垂

王禹偁詩新晴淡淡霞

林逋詩水痕天影蘸秋霞

范仲淹詩歸雲識舊峰

趙抃詩橫紅數抹霞

蘇舜欽詩嬌雲濃暝弄春晴

王安石詩誰似浮雲知進退纔成霖雨又歸山又藹

藹當窻一炷雲又雲尚無心能出岫不應君更嬾於

雲

蘇軾詩江雲有態清且媚又遊人脚底一聲雷滿座
頑雲撥不開又藹藹青城雲又微微出岫雲又新詩
藹藹嶺頭雲又嶺上晴雲披絮帽

文同詩漠漠嶺頭雲

范成大詩海氣烘晴入斷霞半空雲影界山斜又朝
暾不與同雲便烘作晴空萬縷霞

陸游詩癡雲不散常遮塔又殘霞明水面又十里織

成無罅錦半天留得未殘霞又數峯當戶雲又濃雲

夜護霜又晴雲蹙細鱗又孤雲寒不飛又濕雲春易

族又雲輕無力護清霜又雲氣平沈一面山又雲氣

將歸別起峯又日落雲全碧

楊萬里詩當面峯頭些子雲坐看吹作雨紛紛

僧惠崇詩僧定石沈雲

元楊載詩微霞銜近空

薩都刺詩落日澹霞收未盡又凍雲欲雪風吹散望

出西山一半青又落日奇峰挂赤霞

倪瓚詩泖雲汀樹晚離離

明吳兆詩江雲度嶺閒

古今圖書集成
小青詩雪意閣雲雲不流舊雲正壓新雲頭

雲霞部紀事一

春秋孔演圖黃帝將興黃雲升於堂

史記五帝本紀黃帝官名皆以雲命為雲師注應劭

曰黃帝受命有雲瑞故以雲紀官也春官為青雲夏

官為縉雲秋官為白雲冬官為黑雲中官為黃雲

古今注黃帝與蚩尤戰於涿鹿之野常有五色雲氣

金枝玉葉止於帝上有花葩之象故因而作華蓋也

竹書紀年帝堯陶唐氏母曰慶都生于斗維之野常

有黃雲覆其上

尚書中候堯沉璧于河白雲起

竹書紀年帝舜十四年卿雲見

注於時和氣普應慶

雲興焉若煙非煙若雲非雲郁郁紛紛蕭索輪困百
工相和而歌慶雲帝乃倡之曰慶雲爛兮紉縵縵兮
日月光華旦復旦兮羣臣咸進頓首曰明明上天爛
然星陳日月光華弘於一人帝乃載歌曰日月有常
星辰有行四時從經萬姓允誠於予論樂配天之靈
遷于聖賢莫不咸聽龔乎鼓之軒乎舞之精華已竭
褰裳去之

淮南子本經訓伯益作井而龍登元雲

帝王世紀主癸之妃曰扶都見白氣貫月意感以乙
日生湯故名履字天乙是謂成湯

春秋孔演圖湯將興白雲入房

拾遺記周武王東伐紂夜濟河時雲明如晝八百之
族皆齊而歌

尚書中候成王觀於洛河沉璧禮畢王退俟至於日
昧榮光並出幕河青雲浮洛

列子殷湯篇薛譚學謳於秦青未窮青之技自謂盡

古今圖書集成
之遂辭歸秦青弗止餞於郊衢撫節悲歌聲振林木
響遏行雲

左傳僖五年春王正月辛亥朔日南至公既視朔遂
登觀臺以望而書禮也凡分至啓閉必書雲物爲備
故也

列仙傳李老君之母玉女嘗晝寢夢五色霞光入戶
結如彈丸流入玉女口中吞之遂有孕後生老君
關尹子題辭關尹者函谷關尹也名喜姓無可考周
末老子西游尹望雲氣候之於關去吏從學焉請著

道德五千言

孟譜孟子生時母夢神人乘雲自泰山來母凝視久
之忽片雲墜而寤里巷皆見有五色雲覆孟氏居
水經注虞氏記云趙侯自五原河曲築長城東至陰
山又於河西造大城一箱崩不就乃改卜陰山河曲
而禱焉晝見羣鵠遊於雲中徘徊經日見火光在其
下武侯曰此爲我乎乃卽於其處築城今雲中城是
也

江西通志饒州府五彩山在餘干縣西南八十里戰

國時吳申自鄱陽徙居生子芮五彩雲見故名
漢書高祖本紀高祖隱於芒碭山澤間呂后與人俱
求常得之高祖怪問呂后后曰季所居上常有雲氣
故從往常得季高祖又喜沛中子弟或聞之多欲附
者矣

香案牘王探師司馬季主與人行身散雲霧
洞冥記漢武帝未誕時景帝夢一赤彘從雲中直下
入崇蘭閣帝覺而坐于閣下果見赤氣如烟霧來蔽
戶牖望中有丹霞蓊鬱而起

漢書郊祀志汾陰巫錦爲民祠魏睢后土營旁見地
如鉤狀掇視得鼎鼎大異於衆鼎文鏤無款識怪之
言吏吏告河東太守勝勝以聞天子使驗問巫得鼎
無姦詐迺以禮祠迎鼎至甘泉從上行薦之至中山
晏溫有黃雲焉有鹿過上自射之因以祭云
天子禪泰山下阯東北肅然山封禪祠其夜若有光
晝有白雲出封中

漢武故事上幸梁父祠地上親拜用樂焉其日上有
白雲又有呼萬歲者禪肅然白雲爲蓋

十洲記天漢三年月氏國獻神香使者曰國有常占
東風入律百旬不休青雲干呂連月不散知中國有
好道之君故貢神香

東方朔別傳有赤雲如冠珥上以問朔朔曰不大雨
即日暈後數日果大雨

漢書外戚傳孝武鉤弋趙婕妤昭帝母也家在河間
武帝巡狩過河間望氣者言此有奇女天子亟使使
召之既至女兩手皆拳上自披之手即時伸由是得
幸號曰拳夫人先是其父坐法宮刑為中黃門死長

安葬雍門拳夫人進為婕妤居鉤弋宮大有寵元始
三年生昭帝

拾遺記元鳳二年于淋池之南起桂臺以望遠氣
後漢書光武本紀論望氣者蘇伯阿為王莽使至南
陽遙望春陵郭喈曰氣佳哉鬱鬱葱葱然

漢官儀光武帝建武三十二年東巡狩二月十九日
之山虞國家居亭百官布野此日上山雲氣成宮闕
百姓皆見

後漢書方術傳樊英隱於壺山之陽嘗有暴風從西

方起英謂學者曰成都市火甚盛因含水向西湫之
乃令記其日時客有從蜀來云是日大火有黑雲卒
從東起須臾大雨火遂得滅

長沙耆舊傳祝良爲洛陽令時大旱告誠引罪紫雲
沓起

宋書符瑞志孫堅之祖名鍾冢上數有光怪雲氣五
色上屬天父老相謂此非凡氣孫氏其興矣

搜神記孫策渡江襲許與于吉俱行時大旱所在熇
厲催將士使速引船或身自早出督切見將吏多在

吉許策因此激怒遂殺之將士哀惜共藏其尸天夜
忽興雲覆之明日往視不知所在

蜀志先主兒時戲於桑樹下上有雲覆如車蓋

魏志卞皇后傳后生齊郡白亭有黃氣滿室移日父
問卜者王旦旦曰此吉祥也

文帝本紀文皇帝中平四年冬生于譙註帝生時有

雲氣青色而圓如車蓋當其上終日望氣者以爲至
貴人之證非人臣之氣

謝氏詩源更羸之妻能作鎖雲囊佩之陟高山有雲

處不必開囊而自然有雲氣入其中歸至家啓視皆有雲氣白如綿自囊而出囊大如蠶繭而可以開合更羸善射每言能仰射入雲中其妻不信因以一囊繫箭頭令射之及墜驗之果有白雲在內因名箭曰鎖雲

晉書張華傳初吳之未滅也斗牛之間常有紫氣道術者皆以吳方強盛未可圖也惟華以爲不然及吳平之後紫氣愈明華聞豫章人雷煥妙達緯象乃要煥宿屏人曰可共尋天文知將來吉凶因登樓仰觀

煥曰僕察之久矣惟斗牛之間頗有異氣華曰是何祥也煥曰寶劍之精上徹於天耳華曰君言得之吾少時有相者言吾年出六十位登三事當得寶劍佩之斯言豈效與因問曰在何郡煥曰在豫章豐城華曰欲屈君爲宰密共尋之可乎煥許之華大喜卽補煥爲豐城令煥到縣掘獄屋基入地四丈餘得一石函光氣非常中有雙劍並刻題一曰龍泉一曰太阿其夕斗牛間氣不復見焉

拾遺記晉太康元年白雲起於灞水三日而滅有司

奏云天下應太平帝問其故曰昔舜時黃雲興於郊野夏代白雲蔽於都邑殷代元雲覆於林藪斯皆應世之休徵殊鄉絕域應有貢其方物也果有羽山之民獻火浣布萬疋

晉書馮跋載記跋三弟皆任俠不修行業惟跋恭慎勤於家產父母器之所居上每有雲氣若樓閣時咸異之

冊府元龜宋高祖嘗遊京口竹林寺獨臥講堂前上有五色龍章衆僧見之驚以白帝帝獨喜曰上人無

妄言帝皇考墓在丹徒之候山其地秦史所謂曲阿丹徒間有天子氣者也

南齊太祖居武進時彭山岡阜相屬數百里不絕其上常有五色雲

隋書律曆志後齊參軍信都芳深有巧思能以管候氣仰觀雲色嘗與人對語即指天曰孟春之氣至矣人往驗管而飛灰已應每月所候言皆無爽

南史梁武帝本紀武帝所居室中常若雲氣人或遇者體輒肅然

物類相感志梁武帝丁嬪初嬪魏益德帝登城見丁氏出遊有五色雲如龍蓋其上遂臨以金兼賂益德而取之竟生昭明簡文焉

陳書徐陵傳陵字孝穆東海郟人母臧氏夢五色雲化爲鳳集左肩已而誕陵焉

冊府元龜高貴鄉公以正始三年九月二十五日生其日天氣清朗堂上黃雲照耀久之乃散

周書太祖本紀太祖德皇帝之少子也母王氏初孕五月夢抱子昇天不至而止寤以告德皇帝帝喜曰

雖不至天貴亦極矣及太祖生有黑氣如蓋下覆其身

隋書高祖本紀高祖母呂氏生高祖於馮翼般若寺紫氣充庭有尼來自河東謂皇妣曰此兒所從來甚異不可於俗間處之尼將高祖舍於別館躬自撫養皇妣常抱高祖忽見頭上角出徧體鱗起皇妣大駭墜高祖於地尼自外入見曰已驚我兒致今晚得天下

冊府元龜高祖旣舉義師之日太宗所居處有紫雲

當其上俄變為五色狀如飛龍所居弘義宮中有一大池常時有佳氣鬱鬱數百尺太宗獨異之至九年其氣轉盛上屬於天

天中記唐高祖起太原次臨汾去絳郡二十餘里有紫雲如華蓋樓閣之形正臨高祖之上

傳燈錄道信大師武德中登廬山絕頂望破額山紫雲如蓋下有白氣橫分六道

唐書狄仁傑傳仁傑為并州法曹參軍親在河陽仁傑登太行山反顧見白雲孤飛謂左右曰吾親舍其

下瞻悵久之雲移乃得去

韋巨源傳景龍二年韋后自言衣笥有五色雲巨源倡其偽勸中宗宣布天下帝從其言因是大赦

中宗庶人韋氏傳神龍三年禁中謬傳有五色雲起后作圖以示諸朝因大赦天下賜百官母妻封號

大唐新語崔希高以仁孝友悌丁母憂哀毀過禮為鄴縣丞芝草生所居堂一宿而葩蓋盈尺州以聞遷

監察御史轉并州兵曹馮翊令貧乏之徒荷其仁恤時有雲氣如蓋當其廳事須臾五色錯雜遍於州郭

以狀聞敕編入史

舊唐書元宗本紀明皇兼潞州別駕州境有黃龍白日升天嘗出畝有紫雲在其上從者望而得之

寶記唐開元中李氏者為尼號曰真如天寶元年七月七日忽於寺庭見五色雲墜眎之一囊中有五物乃寶玉也真如獻於朝

唐實錄開元十九年興慶宮親耕三百餘步既而有青光紫氣覆地

冊府元龜天寶元年六月乙未隴右節度皇甫惟明

奏龍支縣人庫狄孝義有馬生龍駒經九旬有九日身有鱗而不生毛臣就簡視有慶雲五色遙覆馬上久而不散伏望宣付史官以光實錄從之

宣和書譜懷素晚精意於翰墨追倣不輟秃筆成塚一夕觀夏雲隨風頓悟筆意自謂得草書三昧

唐書肅宗本紀肅宗自奉天而北夕次承壽有白雲起西北長數丈如樓閣之狀識者以為天子之氣

冊府元龜代宗寶應元年四月己巳即位其日有慶雲見初帝至飛龍廡座前有紫雲見雲中有三白鶴

徊翔又有喜鵲鳴及將卽位仗衛宿設夜分雲霧四合不辨咫尺旣曉朝呼萬歲天地清朗非煙滿空黃氣抱日咸以爲聖感

杜陽雜編代宗廣德元年吐蕃犯便橋上幸陝王師不利常有紫氣如車蓋以迎馬首

大曆中日林國獻龍角釵上因賜獨孤妃與上同遊龍舟池有紫雲白釵上而生俄頃滿於舟楫上命置之掌內以水噴之遂化爲二龍騰空東去

浙江通志嘉興府紫雲山在嘉興縣西南三十六里

唐建中時有村女出耕紫雲輒覆之後詔入宮山以此名

冊府元龜德宗興元元年八月宋亳觀察使奏先天觀元元皇帝太后陵槐樹上有靈泉湧出六月忽有靈氣五色見於泉上

雲仙雜記白樂天燒丹於廬山草堂作飛雲履元綾爲質四面以素綃作雲朶染以四選香振履則如煙霧樂天著示山中道友曰吾足下生雲計不久上升朱府

魏郡開成中大旱徧禱山岳或言西沈陸先生道行精明請之必驗太守以下乃攜杏酒青羊以備牲醪告于山中先生受禮訖對太守呼吸數過五指連拂之爪甲間皆出雲煙之氣惟中指氣象甚盛先生曰郡中雨得足諸縣皆獲八分亦可小稔已而其說不誣

酉陽雜俎史論作將軍時妻蚤妝開奩奩中忽有五色龜大如錢吐五色氣彌滿一室後常養之雲麓漫抄梁瑄不歸弟璟每見東南白雲卽立望慘

然久之

稽神錄周太祖爲樞密時北征如澶淵旭日日邊有紫光當太祖馬首之上高不及百尺從官異之至鄴都一夕在亭院齋忽有黃氣起於前繚繞而上遽際於天太祖於黃氣中仰見星文紫微文昌爛然在目駭曰予在室中而見天象不其異乎密告知星者乃拜賀曰坐見天衢物不能隔至貴之祥也異日又於署衙中有紫氣起於旛竿龍頭之上凡二日觀者異之及討李守真於河中守真登陴瞰陣氣色不懾獨

言曰是何妖變後城中人言見太祖軍上有紫氣如樓閣車蓋之狀故也

遼史穆宗皇后蕭氏父知璠內供奉翰林承旨后生雲氣馥郁久之

